

**ZAKON
O REVIZIJI FINANSIJSKOG POSLOVANJA
INSTITUCIJA BRČKO DISTRIKTA BiH**

Na osnovu člana 23 Statuta Brčko distrikta BiH ("Službeni glasnik Brčko distrikta BiH", brojevi 1/00 i 7/04) i člana 1 Odluke o izmjenama i dopunama Statuta Brčko distrikta BiH, broj: 0-02-022-143/05 od 07. jula 2005. godine, Skupština Brčko distrikta BiH na 16. sjednici održanoj 30. juna i 07. jula 2005. godine, usvaja

ZAKON O REVIZIJI FINANSIJSKOG POSLOVANJA INSTITUCIJA BRČKO DISTRIKTA BOSNE I HERCEGOVINE

I. OSNOVNE ODREDBE

Član 1

Ovim zakonom regulišu se subjekti revizije, osnivanje i način rada Ureda za reviziju finansijskog poslovanja institucija Brčko distrikta Bosne i Hercegovine (u daljem tekstu: Ured), imenovanje glavnog revizora, zamjenika glavnog revizora i vršioca dužnosti glavnog revizora, regulišu nadležnosti, ovlaštenja i odgovornosti glavnog revizora, vrste revizije i podnošenje izvještaja o reviziji i osiguranje kvaliteta rada Ureda za reviziju finansijskog poslovanja institucija Brčko distrikta Bosne i Hercegovine (u daljem tekstu: Distrikta).

Opće definicije

Član 2

U smislu ovog zakona, upotrijebljeni izrazi imaju slijedeća značenja:

"Ured za reviziju finansijskog poslovanja institucija Brčko distrikta BiH" znači: Institucija za reviziju finansijskog poslovanja institucija Distrikta u skladu s članom 3 ovog zakona;

"Glavni revizor" znači: lice imenovano na funkciju u skladu sa ovim zakonom;

"Koordinacioni odbor" znači: stručni odbor koji sačinjavaju generalni revizori institucija za reviziju u Bosni i Hercegovini, uspostavljeni prema članu 27 ovog zakona;

"Institucija" znači: sve institucije Distrikta utvrđene Statutom Brčko distrikta Bosne i Hercegovine i zakonom, vladine agencije, vladina tijela, vladina preduzeća i drugi subjekti u kojima Vlada ima dionice i udjele i subjekti koji u fiskalnoj godini ostvaruju više od 50% prihoda iz budžeta Distrikta;

"Skupština" znači Skupštinu Distrikta;

"Vlada" znači Vlada Distrikta;

"Revizija učinka" osobe ili organa, znači: pregled ili ispitivanje svih aspekata poslovanja te osobe ili organa;

"Predsjedništvo" se odnosi na Predsjedništvo Skupštine;

"Pre-revizija" se odnosi na ispitivanje i certifikaciju računovodstvenih transakcija u sastavu računovodstvenog sistema;

"Ovlašteni predstavnik" znači bilo koji predstavnik kojeg glavni revizor ovlasti, u pisanoj formi, da izvršava ovlaštenja ili obavlja zadatke;

"Prostorije" znači: zgrade, urede, bilo koje zemljište i mjesto;

"Pismeno ovlaštenje" znači: ovlaštenje koje je potpisao glavni revizor kojim se izjavljuje da je određeni predstavnik ovlašten za vršenje tih aktivnosti;

"Javni izvještaj" znači: izvještaj koji će se dostaviti Skupštini na raspravljanje;

"Povjerljive informacije" znači: bilo koje informacije čije bi objavljivanje bilo u suprotnosti s javnim interesima u smislu sigurnosti i unutrašnjih odnosa ili koje prejudiciraju zaštićene ekonomske interese bilo kojeg pojedinca ili institucije, kakvi su usvojeni u uobičajenoj ekonomskoj praksi.

II. URED ZA REVIZIJU FINANSIJSKOG POSLOVANJA INSTITUCIJA BRČKO DISTRIKTA BOSNE I HERCEGOVINE

Osnivanje

Član 3

- (1) Osniva se institucija za reviziju finansijskog poslovanja institucija Distrikta koja se naziva "Ured za reviziju finansijskog poslovanja institucija Brčko distrikta Bosne i Hercegovine" (u daljem tekstu: Ured za reviziju).
- (2) Ured za reviziju sačinjavaju glavni revizor, zamjenici glavnog revizora, vršilac dužnosti glavnog revizora i osoblje iz člana 5 ovog zakona.
- (3) Sjedište Ureda za reviziju je u Brčkom, a adresu određuje Skupština.
- (4) Ured za reviziju ima svojstvo pravnog lica.
- (5) Ured za reviziju ima pečat oblika kruga, veličine promjera 40 milimetara i sadrži tekst: Bosna i Hercegovina, Brčko distrikt Bosne i Hercegovine, Ured – Kancelarija za reviziju finansijskog poslovanja institucija Brčko distrikta Bosne i Hercegovine, ispisan ćirilčnim i latiničnim pismom, s tim da su oba naziva u obliku koncentričnih krugova koji neposredno okružuju grb Bosne i Hercegovine, koji se nalazi u središtu pečata.

Funkcija

Član 4

Funkcija Ureda za reviziju je da pomogne glavnom revizoru u obavljanju zadataka glavnog revizora.

Osoblje

Član 5

Osoblje Ureda za reviziju bit će osobe imenovane u skladu s pravilnikom o unutarnjoj organizaciji i sistematizaciji radnih mjesta koji utvrdi glavni revizor, a uz prethodnu saglasnost Skupštine.

III. GLAVNI REVIZOR

Glavni revizor

Član 6

- (1) U skladu s ovim zakonom se imenuje glavni revizor finansijskog poslovanja institucija Distrikta.
- (2) Glavnog revizora imenuje Skupština.
- (3) Glavni revizor se imenuje na period od pet godina uz mogućnost još jednog imenovanja.
- (4) Glavni revizor može podnijeti pismenu ostavku Skupštini.
- (5) Skupština može smijeniti s dužnosti glavnog revizora samo zbog činjenja krivičnog djela, na osnovu potvrđene optužnice za krivično djelo za koje je predviđena donja granica kazne zatvora od 3 mjeseca ili ako kvalitet revizije ne zadovoljava standarde postavljene članom 9 ovog zakona.
- (6) Plaća glavnog revizora se propisuje posebnim aktom koji donosi Skupština. Ured za reviziju se finansira iz budžeta Distrikta u okviru budžetskih sredstava iz kojih se finansira Skupština.

(7) Imenovanje glavnog revizora i prestanak dužnosti se objavljuju u "Službenom glasniku Distrikta".

Zamjenik glavnog revizora

Član 7

- (1) U skladu s ovim zakonom, imenuju se dva zamjenika glavnog revizora finansijskog poslovanja institucija Distrikta.
- (2) Zamjenike glavnog revizora imenuje Skupština.
- (3) Zamjenici glavnog revizora se imenuju na period od pet godina uz mogućnost još jednog imenovanja.
- (4) Zamjenik glavnog revizora može podnijeti pismenu ostavku Skupštini.
- (5) Skupština može smijeniti s dužnosti zamjenika glavnog revizora samo zbog činjenja krivičnog djela, na osnovu potvrđene optužnice za krivično djelo za koje je predviđena donja granica kazne zatvora od 3 mjeseca ili ako kvalitet revizije ne zadovoljava standarde postavljene članom 9 ovog zakona.

Imenovanje vršilaca dužnosti

Član 8

- (1) Skupština će imenovati zamjenika glavnog revizora za vršioca dužnosti glavnog revizora:
 - (a) ako postoji upražnjeno mjesto glavnog revizora ili
 - (b) u vrijeme kada je glavni revizor odsutan s dužnosti ili je iz bilo kojeg razloga spriječen da obavlja svoju dužnost za period duži od 30 dana.
- (2) Vršenje dužnosti u skladu sa stavom 1 ovog člana neće trajati duže od 6 mjeseci.
- (3) Imenovanje vršioaca dužnosti glavnog revizora i prestanak dužnosti se objavljuju u "Službenom glasniku Brčko distrikta BiH".

IV. GLAVNI ZADACI I OVLAŠTENJA GLAVNOG REVIZORA

Dužnosti glavnog revizora

Član 9

- (1) U obavljanju svojih dužnosti po ovom zakonu, glavni revizor će utvrditi:
 - (a) da li su poduzete sve razumne predostrožnosti za osiguranje ubiranja i čuvanja prihoda institucija Distrikta i da se pridržava zakona, instrukcija i uputa koji se na njih odnose i
 - (b) da li su isplate prihoda, uključujući vanbudžetska sredstva, vrše po odgovarajućem ovlaštenju i za svrhe za koje je dato ovlaštenje.
- (2) Pored svojih dužnosti iz stava 1 ovog člana, glavni revizor upozorava Vladu Distrikta o svim očiglednim nedostacima ekonomičnosti, efikasnosti i uspješnosti:
 - (a) u prikupljanju i staranju o prihodima i
 - (b) u trošenjima ili korištenju prihoda, uključujući vanbudžetska sredstva.

Zadaci po drugim zakonima

Član 10

Funkcija glavnog revizora obuhvata sve zadatke koji su dati glavnom revizoru po bilo kom drugom zakonu.

Prenošenje ovlaštenja glavnog revizora

Član 11

- (1) Glavni revizor može, u pisanoj formi, prenijeti bilo koje od ovlaštenja glavnog revizora po bilo kojem zakonu, bilo kojem od službenika Ureda za reviziju ili lica angažovanih po ugovoru. Glavni revizor ni u kom slučaju ne može prenijeti svoje odgovornosti.
- (2) Pri izvršavanju ovim prenesenih ovlaštenja, službenik ili lice angažovano po ugovoru mora postupiti u skladu sa svim decidnim uputama glavnog revizora.

Računi i revizija

Član 12

- (1) Glavni revizor vrši godišnju reviziju javnih računa koja uključuje sva odjeljenja, urede, sudove i organe vlade, javne fondove i one subjekte koji u fiskalnoj godini ostvaruju više od 50% prihoda iz budžeta Distrikta i izvještaj podnosi Skupštini.
- (2) Tamo gdje javni računi bilo kojeg definisanog organa nisu raspoloživi tri mjeseca nakon završetka obračunskog perioda, glavni revizor će izvijestiti Skupštinu o činjenici takve neraspoloživosti.
- (3) Funkcija glavnog revizora u vezi s javnim računima uključuje, ali se ne ograničava samo na, reviziju finansijskih obračuna i izvještaja:
 - (a) preduzeća, kompanija, organizacija ili institucija djelimično ili potpuno u vlasništvu, kontrolisane ili finansirane iz budžeta Distrikta ili drugih fondova koje kontrolišu ili za koje daje garancije Distrikt,
 - (b) institucije ili aktivnosti koje dobivaju budžetska sredstva ili sredstva koja osiguravaju vanjske organizacije bilo kao zajam ili nepovratna sredstva za Distrikt i
 - (c) subjekti koji u fiskalnoj godini ostvaruju više od 50% prihoda iz budžeta Distrikta.
- (4) Pri izvještavanju o javnim računima iz st. 1 i 2 ovog člana, glavni revizor izvještava:
 - (a) da li su računi sastavljeni u skladu s važećom zakonskom regulativom,
 - (b) da li godišnji računi odražavaju tačan i istinit prikaz poslovanja tokom godine i stanja na kraju godine i
 - (c) o ekonomičnosti, efikasnosti i uspješnosti kojim su institucije koristile svoja sredstva u obavljanju svojih funkcija.
- (5) Glavni revizor podnosi svoj izvještaj revidiranom subjektu, Vladi i Skupštini.

Revizije učinka

Član 13

- (1) U pogledu ekonomičnosti, efikasnosti i uspješnosti, glavni revizor može u bilo koje vrijeme izvršiti pregled ili ispitivanje određenog aspekta poslovanja cijele ili dijela institucije.
- (2) Nakon završetka izvještaja o reviziji po ovom članu glavni revizor, čim bude moguće, podnosi svoj izvještaj revidiranom subjektu, Vladi i Skupštini.

Mišljenje o izvještaju revizije

Član 14

- (1) Nakon pripreme predloženog izvještaja o reviziji učinka, glavni revizor dužan je dati kopiju predloženog izvještaja licu na čelu administracije revidirane institucije.

(2) Ako primalac izvještaja revizije dostavi pisano mišljenje glavnom revizoru u roku od **15** dana nakon prijema predloženog izvještaja, glavni revizor ih je dužan razmotriti prije pripreme konačnog izvještaja i na mjestima gdje se utvrdi neslaganje obuhvatiti ih u konačnom izvještaju koji će se dostaviti revidiranom subjektu, Vladi i Skupštini.

Specijalne revizije i revizije po sporazumu

Član 15

- (1) Glavni revizor može u bilo koje vrijeme izvršiti specijalne revizije na zahtjev Skupštine, Vlade ili dotične institucije Distrikta.
- (2) Glavni revizor može sklopiti sporazum sa bilo kojom osobom ili institucijom za:
 - (a) vršenje revizije finansijskih poslovanja lica ili institucije,
 - (b) provođenje revizije učinka lica ili institucije i
 - (c) pružanje usluga licu ili instituciji iz djelokruga uobičajenih aktivnosti revizora.
- (3) Korisnik specijalne revizije i revizije po sporazumu mora osigurati plaćanje naknade glavnom revizoru. Ove naknade prima Ured za reviziju.
- (4) Glavni revizor ne smije obavljati zadatke po ovom članu u svrhu koja je izvan zakonskog ovlaštenja.

Standardi revizije

Član 16

- (1) Glavni revizor mora primjenjivati standarde revizije koje odobri Koordinacioni odbor institucija za reviziju BiH i osigurati da te standarde primjenjuju sva lica koja vrše bilo koje zadatke revizije po ovom zakonu.
- (2) Ako glavni revizor dođe do saznanja o bilo kakvom kršenju tih standarda on mora o tome izvijestiti u izvještaju iz člana 17 ovog zakona.

Specijalni izvještaji za Skupštinu

Član 17

- (1) Glavni revizor može u bilo koje vrijeme dostaviti na razmatranje izvještaj Skupštini o bilo kom problemu iz svoje nadležnosti.
- (2) Glavni revizor dužan je dostaviti izvještaj Skupštini, Vladi i revidiranoj instituciji Distrikta.

Angažovanje vanjskih saradnika

Član 18

Glavni revizor može, u svoje ime, bilo po ugovoru ili u radnom odnosu, angažovati bilo koje lice za ispomoć pri obavljanju bilo kojeg zadatka glavnog revizora.

Godišnji izvještaj Ureda za reviziju

Član 19

- (1) Ured za reviziju je dužan najkasnije do 31. marta tekuće godine dostaviti Skupštini Izvještaj o radu za prethodnu godinu.
- (2) Glavni revizor donosi program rada ureda za reviziju za narednu godinu, najkasnije do 31. decembra tekuće godine, koji mora biti odobren od Skupštine.

V. OVLAŠTENJE ZA PRIKUPLJANJE INFORMACIJA I TAJNOST

Ovlaštenja za prikupljanje informacija koje ne ograničavaju drugi zakoni

Član 20

Aktivnosti iz čl. 22 i 23 ovog zakona se ne ograničavaju ni po kom drugom zakonu, osim do mjere u kojoj drugi zakon izričito isključuje aktivnosti iz navedenih članova.

Svrhe u koje se može koristiti ovlaštenje za prikupljanje informacija

Član 21

Ovlaštenja iz čl. 22 i 23 se mogu koristiti u svrhu ili u vezi s bilo kojom funkcijom glavnog revizora, osim:

- (a) revizije ili druge zadatke iz člana 10,
- (b) pripremanje izvještaja iz čl. 17 i 18 i
- (c) izvještavanje o kršenju uspostavljenih standarda revizije iz člana 16.

Ovlaštenja glavnog revizora da dođe do informacija

Član 22

(1) Glavni revizor može, uz pismeno obavještenje, zahtijevati od institucije u kojoj se vrši revizija, da:

- (a) pruži glavnom revizoru bilo koju informaciju koju glavni revizor traži,
- (b) skrene pažnju ili predoči dokaz glavnom revizoru ili ovlaštenom predstavniku i
- (c) predoči glavnom revizoru bilo koji dokument koji to lice čuva ili je pod njenom kontrolom.

(2) Glavni revizor može zahtijevati:

- (a) da se informacije ili odgovori na pitanja daju usmeno ili pismeno i
- (b) da informacije ili odgovori na pitanja budu verificirani pismenom izjavom ili dati kao tvrdnja. Izjava ili tvrdnja je dokaz da su informacije ili odgovori koje osoba daje istiniti i da ih mogu koristiti glavni revizor ili ovlašteni predstavnik.

(3) Lice iz stava 1 ovog člana se mora ponašati u skladu sa zahtjevima iz ovog člana.

Pristup prostorijama

Član 23

(1) Glavni revizor ili ovlašteni predstavnik:

- (a) mogu, u bilo koje razumno vrijeme, ući i ostati u bilo kojoj prostoriji koju koristi institucija,
- (b) imaju pravo na potpun i slobodan pristup, u bilo koje razumno vrijeme, bilo kom dokumentu ili drugoj imovini i
- (c) mogu pregledati, kopirati ili uzeti izvode bilo kojeg dokumenta.

(2) Ovlašteni predstavnik nema pravo ući i ostati u prostorijama ako na zahtjev njihovog korisnika ne predoči pismeno ovlaštenje kojim dokazuje svoja ovlaštenja.

(3) Ako ovlašteni predstavnik uđe ili predloži da uđe u prostorije, njihov korisnik dužan je ovlaštenom predstavniku osigurati razumna sredstva za uspješno izvršenje ovlaštenja iz ovog člana.

Lažne izjave

Član 24

Lice ne smije dati usmenu ili pismenu izjavu ovlaštenom predstavniku za reviziju za koju zna da je lažna ili bi trebao znati da je lažna.

Povjerljivost informacija

Član 25

(1) Ako ovlašteno lice dobije informaciju u toku obavljanja zadatka glavnog revizora, ne smije tu informaciju prenositi, osim u toku obavljanja zadatka glavnog revizora ili u svrhu bilo kojeg zakona koji daje zadatke glavnom revizoru.

(2) Prethodni stav ovog člana ne sprječava glavnog revizora da prenese konkretnu informaciju kompetentnom organu, ukoliko je to, po mišljenju glavnog revizora od javnog interesa.

Povjerljive informacije koje se ne daju u javnom izvještaju

Član 26

(1) Glavni revizor određene informacije ne smije uključiti u javni izvještaj ako:

(a) smatra da su te informacije povjerljive i

(b) nadležni funkcioner izda glavnom revizoru potvrdu kojom izjavljuje da su te informacije, po njegovom mišljenju, povjerljive informacije.

(2) Ako se steknu uslovi iz prethodnog stava zbog kojih glavni revizor će odlučiti da:

(a) ne pripremi javni izvještaj ili

(b) ispusti određene informacije iz javnog izvještaja.

Glavni revizor može pripremiti izvještaj koji uključuje dotične povjerljive informacije. Glavni revizor dužan je dostaviti izvještaj iz ovog stava Skupštini, Vladi i revidiranim institucijama Distrikta.

VI. KOORDINACIONI ODBOR INSTITUCIJA ZA REVIZIJU

Član 27

(1) Ured za reviziju finansijskog poslovanja institucija Distrikta saraduje s Koordinacionim odborom institucija za reviziju Bosne i Hercegovine.

(2) Koordinacioni odbor čine glavni revizori Institucija za reviziju iz Republike Srpske, Federacije BiH i Kancelarije za reviziju finansijskog poslovanja institucija Bosne i Hercegovine. Koordinacionim odborom će predsjedavati glavni revizor Ureda za reviziju finansijskog poslovanja institucija BiH. U odsustvu glavnog revizora, sastancima Koordinacionog odbora može prisustvovati njegov ovlašteni predstavnik.

(3) Najvažniji zadaci Koordinacionog odbora su:

(a) uspostava usklađenih standarda revizije,

(b) osiguravanje konzistentnog kvaliteta revizije,

(c) određivanje odgovornosti za vršenje revizije zajedničkih aktivnosti i

(d) određivanje zastupanja u međunarodnim tijelima.

VII. OSIGURANJE KVALITETA RADA UREDA ZA REVIZIJU

Odgovornost za osiguranje kvaliteta

Član 28

Osiguranje kvaliteta rada Ureda za reviziju će biti pod kontrolom Skupštine.

Dužnosti i odgovornosti

Član 29

(1) Skupština imenuje nezavisnog kontrolora kvaliteta koji vrši pregled rada Ureda glavnog revizora da bi utvrdio da li je taj rad u skladu sa zakonom, odobrenim standardima revizije i međunarodno prihvatljivim kvalitetom revizije. Kontrolor kvaliteta imenovan po ovom članu će biti međunarodno priznata organizacija sa stručnošću u radu institucija za reviziju. Da bi obavljao svoj rad, kontrolor kvaliteta može pregledati dokumentaciju i materijale koje ima glavni revizor, razgovarati sa osobljem za reviziju, pratiti ih pri obavljanju revizije ili provoditi neke druge istražne radnje koje bude smatrao neophodnim.

Izveštavanje

Član 30

Kontrolor kvaliteta će tokom svake godine:

- (a) dostaviti Skupštini Izveštaj o kontroli kvaliteta poslova revizije koji sadrži zaključke i preporuke za djelovanje,
- (b) u svakom izvještaju, osim prvog, kontrolor kvaliteta daje komentar o tome u kojoj mjeri su provedene preporuke iz ranijih izvještaja o kontroli kvaliteta,
- (c) dostavlja glavnom revizoru izvještaj u formi nacrtu, pri čemu glavni revizor može u roku od 15 dana dati svoje komentare na taj izvještaj, koje kontrolor treba uzeti u obzir pri izradi konačnog izvještaja i
- (d) o svim izvještajima o kontroli kvaliteta koji se dostavljaju Skupštini u skladu s odredbama ovog zakona objavljuje se informacija u "Službenom glasniku Distrikta" i mogu se nabaviti u Uredu za reviziju finansijskog poslovanja institucija Distrikta.

Povjerljivost informacija

Član 31

Ako ovlašteno lice u toku obavljanja zadatka iz ovog poglavlja dođe do informacija, ne smije ih prenositi osim u toku obavljanja zadatka.

Garantovana raspoloživa sredstva koja odredi Vlada

Član 32

Vlada obezbjeđuje sredstva u punom iznosu koja odobri Skupština za rad Ureda za reviziju.

Glavni revizor može odobravati troškove

Član 33

Glavni revizor ima ovlaštenje za odobravanja prijedloga utroška sredstava dodijeljenih Uredu za reviziju.

Naknada za reviziju

Član 34

- (1) Lice ili institucija čiji se finansijski obračuni revidiraju na njen zahtjev je dužna da plati naknadu za reviziju, na osnovu cjenovnika koji utvrdi glavni revizor i odobri Skupština.
- (2) Glavni revizor mora, u godišnji izvještaj iz člana 15 ovog zakona, uključiti detaljne informacije o tome na osnovu čega su određene naknade za reviziju koje su se primjenjivale tokom te poslovne godine.

Objavljivanje izvještaja

Član 35

Svi izvještaji koje glavni revizor podnosi Skupštini, u skladu sa odredbama ovog zakona, treba da se navedu u "Službenom glasniku Distrikta". Izvještaji su dostupni uz naknadu u Uredu za reviziju.

Nezavisnost od usmjeravanja ili kontrole

Član 36

U obavljanju svojih zadataka po ovom zakonu, glavni revizor ne podliježe usmjeravanju niti kontroli od bilo kojeg lica ili institucije osim Skupštine.

Oslobađanje od odgovornosti

Član 37

Skupština mora osloboditi lice od svake odgovornosti za djelo ili propust tog lica u toku obavljanja zadataka glavnog revizora, osim umišljaja ili savjesnog nehata za prevaru.

Propisi

Član 38

Skupština će, na prijedlog glavnog revizora, donijeti podzakonske akte:

(a) čije se donošenje ovim zakonom zahtijeva ili dopušta ili

(b) čije je donošenje neophodno ili od koristi za provođenje ili omogućavanje provođenja ovog zakona.

Član 39

Skupština jednom godišnje imenuje nezavisnog kontrolora kvaliteta na osnovu Zakona o javnim nabavkama Bosne i Hercegovine, ovog zakona i podzakonskih akata Distrikta tako da objavi javni tender najkasnije do 31. decembra tekuće godine, izvrši izbor najpovoljnijeg ponuđača najkasnije do 31. marta naredne godine i sa obavezom izabranog kontrolora kvaliteta da predloži Skupštini pismeni izvještaj najkasnije do 30. septembra za prethodnu godinu.

Kazne

Član 40

Licu odgovornom za kršenje odredbi datih čl. 22 stav 3, 23 stav 3, 24 i 25 stav 1 ovog zakona, izreći će se novčana kazna u iznosu od 1.000 KM do 10.000 KM.

VIII. PRIJELAZNE I ZAVRŠNE ODREDBE

Primjena zakona

Član 41

U slučaju sukoba sa obavezama propisanim drugim zakonima ili propisima, primjenjivat će se ovaj zakon.

Član 42

(1) Glavnog revizora i zamjenike glavnog revizora imenuje Skupština u roku od tri mjeseca od dana stupanja na snagu ovog zakona.

(2) Postupak o izboru i imenovanju glavnog revizora i zamjenika glavnog revizora vršit će u skladu sa aktom koji će na prijedlog predsjednika donijeti Skupština u roku od 30 dana od dana stupanja na snagu ovog zakona.

Član 43

Ovaj zakon stupa na snagu 8. (osmog) dana od dana objavljivanja u "Službenom glasniku Brčko distrikta BiH".

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj: 0-02-022-144/05
Brčko, 07. juli 2005. godine

PREDSJEDNIK
SKUPŠTINE BRČKO DISTRIKTA BiH

Prof. dr. Milan Tomić